

西  
巡  
大  
事  
記

西巡大事記卷十

光緒二十七年八月至九月

目錄

奕劻李鴻章致樞垣德廷不願醇王轉使他國請旨電八月初五日

張之洞致樞垣鑄造銀元須江鄂粵三局合造方可整頓電初六日

劉坤一張之洞致樞垣聞英人有駐兵長江之說全權曾否奏明電

初九日

劉坤一致樞垣三省合鑄銀元祇抵外幣必須另設京局電初十日

奕劻李鴻章致樞垣未聞長江駐英兵之說請確實考證電十一日

劉坤一奏籌款莫如鹽斤加價請飭各省一律照加電十三日

奕劻李鴻章奏照錄畫押條款全文繕單呈覽摺十八日

奕劻李鴻章致樞垣英派馬凱議商約請旨派盛宣懷會議電

十九日

戶部奏新定賠款數鉅期迫亟宜合力通籌摺二十一日

李鴻章致樞垣俄外部拒絕羅豐祿使俄電二十一日

李盛鐸致樞垣日外部謂俄約緩議爲是電二十五日

李鴻章奏東三省事俄使送商改約稿全文電二十六日

劉坤一致樞垣據日領電俄使與李相協定密款祈確查電二十九日

那桐奏赴日齎送杉山彬祭葬銀兩並賜祭情形片九月初二日

奕劻李鴻章致樞垣據楊儒稱東省事俄外部擬在京商辦電

初二日

劉坤一致樞垣俄約撤兵及限制我兵均礙主權請勿簽押電

初三日

盛宣懷致全權大臣中英會議商約乞奏發文憑電初四日

奕劻李鴻章奏請派胡燏棻爲關內外鐵路大臣電初六日

增祺致樞垣東三省俄人包括利權漸逼漸緊已與磋商函初六日

軍機處致劉坤一希詢日本於回鑾後果否代我詰俄撤兵電初六日

軍機處致全權大臣請與俄使逐條婉商更改新約電初八日

劉坤一致樞垣日允回鑾後詰俄撤兵電十一日

張之洞致樞垣籌款爲難惟有鹽斤加價電十三日

張百熙奏請將國子監歸併大學堂摺附片二件十三日

奕劻李鴻章致樞垣俄使駁我要求並聲明緩撤兵之故電十七日

軍機處致全權大臣俄約定後倫各國起而相難何策應付請覆電

十八日

奕劻等奏酌擬會試變通事宜請旨遵行摺二十日

李鴻章奏與比使議定天津租界章程請旨畫押摺二十二日

張之洞致樞垣賠款緊急擬在宜昌加抽土藥稅二成電二十二日

盛宣懷致樞垣報李相吐血電二十二日

劉坤一致樞垣據李使稱日外部告新俄約情形電二十三日

李鴻章奏病勢危篤請飭慶親王回京電二十六日

周馥稟樞垣李鴻章本日出缺電二十七日

薩保奏俄員請辦黑省各鑛謹擬章約十四條摺二十八日

薩保奏俄人限制兵民鎗械侵我商民生計請飭力爭片二十八日

西巡大事記卷十

黃巖弢夫王彥威輯

男希隱亮編

孫孝章敬立校

光緒二十七年八月初一日 駐蹕西安府城

上諭本日禮部奏回鑾有期請派員致祭嶽瀆一摺中嶽嵩山西嶽華山着派陸潤庠先期前往致祭蹕路所經名山大川古帝王陵廟名臣先儒祠墓著陝西巡撫派鎮道大員就近致祭其直隸河南等處由該撫咨行該督撫一律遵照辦理

上諭前因各省制兵防勇積弊甚深業經通諭各督撫認真裁節另練

有用之兵因思練兵必先選將而將才端由教育而成自非廣建武備學堂挑選練習不足儲腹心干城之選但學堂成效既非旦夕可期其各省之設有學堂者學成之員現尙不敷分調惟有先就原有將弁擇其樸實勤奮者遴選擢用著各省將軍督撫將原有各營嚴行裁汰精選若干營分爲常備續備巡警等軍一律操習新式鎗礮認真訓練以成勁旅仍隨時嚴切考校如再沾染積習疎惰廢弛即行嚴叅懲辦朝廷振興戎政在此一舉各該將軍督撫務當實力整頓加意講求期於日有起色無負諄諄申敕之至意所有改練章程及應如何更定餉章著政務處咨行各省悉心核議奏明辦理

初二日 駐蹕西安府城

上諭人才爲庶政之本作育人才端在修明學術三代以來學校之隆皆以德行道藝爲重故其時體用兼備賢才衆多近日士子或空疏無用或浮薄寡實今欲痛除此弊自非敦教勸學無由感發興起除京師已設大學堂應行切實整頓外著將各省所有書院於省城均改設大學堂各府廳直隸州均設中學堂各州縣均設立小學堂並多設蒙養學堂其教法當以四書五經綱常大義爲主以歷代史鑑及中外政治藝學爲輔務使心術端正文行交修博通時務講求實用庶幾植基在本成德達才方副朕圖治作人之至意著各該督撫學政切實通籌認真舉辦所有慎延師長安定教規及學生卒業應如何選舉鼓勵一切詳細章程著政務處咨行各省悉心酌議會同禮部覆核具奏



初三日 駐蹕西安府城

慶親王奏本月初二日英義兩國將頤和園交還其圓明園靜宜園靜明園均先已陸續交還現派兵守衛矣

初四日 駐蹕西安府城

上諭造就人才實爲當今急務前據江南湖北四川等省選派學生出洋游學用意甚善著各省督撫一律仿照辦理務擇心術端正文理明通之士前往學習於一切專門藝學認真肄業加意講求學成領有憑照回華即由該督撫學政按其所學分門考驗如實與憑照相符即行出具切實考語咨送外務部覆加考驗擇尤奏請獎勵其游學經費著各省妥籌發給准其作正開銷如有自備資斧出洋游學者著由該省

奕劻李鴻章致德王不願  
德廷轉使  
他國請旨  
電

督撫咨明該出使大臣隨時照料如果學成得優等憑照回華准照派出學生一體考驗獎勵均候旨分別賞給進士舉人各項出身以備任用而資鼓舞

### 初五日 駐蹕西安府城

全權大臣電信 接醇王電德外部云醇王如往歐洲英意比各國有違專誠之意德皇意頗不懌云云且德皇雖優禮有加而於前事終不釋然而在此水土亦不服擬事畢赴美日即順道回國請代奏候旨遵行云

### 初六日 駐蹕西安府城

懿旨載灃江電覽悉此行本爲德國專使該親王現有水土不服之證

飲食減少聞之深爲慮念在德使事既畢著即起程回華以慰遠繫美日意比各國使事暫從緩議此時均毋庸前往

張之洞致  
馮元鎮江  
鄂粵三局  
台造方可  
登頓電

張之洞電信 前奉諭旨推廣暢行銀元專令廣東湖北鑄造銀元等因查此事係整飭銀幣大政自以多鑄廣行多收多發風氣方能轉移官民方覺便利積弊方能早除且認真辦理盈餘甚微必鑄數甚多方有盈餘可計各省應放之款即按三成計已在二千萬以外鄂局機器不大現正添機擴充粵省機器亦小洞所深知鄂粵兩局所出不多不足供各省解款發款之用添機尙需時日江南銀元局機器最大閒廢不用甚爲可惜似以江鄂粵三局合造爲宜若慮製造未精儘可嚴飭該局認真化驗務令三局一律惟向來各省辦事往往各分畛域章程

參差以致互相防礙不能通行此次必須三局事事畫一方可整頓至鑄本最爲難籌除本省外必須將某省附於某局代鑄豫先議定一公平辦法務令其將本省自用之數與外省附鑄之數合計三局大率相等庶鑄本多少不至偏枯以免畸輕畸重自相擠壓暢滯不一不然江南財力數倍於鄂鄂局不能支矣此節如蒙俞允三局並鑄再當與江粵電商會同奏辦再收放俱搭三成一節似尙應稍加變通竊謂不如改爲收放俱搭一半較爲簡易蓋各款多有畸零若三成則核算甚繁仍多不便若一半則易於折算罕有錯誤可否由各省酌量試辦並懇請旨裁定以便速籌舉辦未盡事宜尙多容會商續陳請代奏之洞叩歌

初七日 駐蹕西安府城

軍機處致張之洞電信 銀元一事江鄂粵三局並造辦法極是卽照所擬與江粵詳細籌商會奏請旨遵辦樞陽

奕劻電信 本月初五日美日本將禁門守衛洋兵撤退奕劻親至率同內務府大臣世續接收卽派前鋒護軍統領妥慎守護其內外各城門均已陸續交還聯軍一律撤退當派綠步各營妥慎守衛請代奏奕劻歌

上諭內務府大臣繼祿著賞穿黃馬褂

上諭回鑾在即榮祿王文韶鹿傳霖羅鴻禩著賞穿黃馬褂

初八日 駐蹕西安府城

劉坤一  
之洞英  
垣開英  
有駐兵  
江之說  
權督否  
明電奏

李鴻章電信 奉懿旨停捐救時善政敢不欽遵惟直隸本係待協省  
分全賴捐款協濟現又獨被兵災若驟失鉅款更難措手應如何籌撥  
抵款實賴盡籌以維大局現擬俟接奉部文後仍遵旨截數具報惟此  
次辦捐推廣極於外洋雖函電兼馳而造冊送京一月萬趕不及若因  
逾限不爲請獎恐遠人失望擬請外洋捐款造冊送部酌緩期限內地  
各局不得援例祈籌示

初九日 駐蹕西安府城

劉坤一張之洞電信 聞英人於六月杪照會全權言長江一帶通商  
口岸直抵重慶府爲止均須由彼駐兵保衛又照會問東三省俄約是  
否另議或仍前說作何歸束所得利益是否各國一律均沾約期索覆

等語雖未敢遽信爲實然人言藉藉未必盡屬無因如果屬實顯係效尤發端未知全權曾否奏明如未奏擬請旨飭詢全權英使是否有此照會若其果確當時如何答覆速令據實電奏如並無此照會更所深幸一詢似亦無妨事關全局坤一等既有所聞不敢緘默請代奏坤一之洞同叩陽

### 初十日 駐蹕西安府城

劉坤一電信 奉諭旨推廣暢行銀元專令鄂粵兩局製造查中國仿造銀元先由鄂粵創辦因限於機力又查上海一關每年進口洋元尙有千餘萬元是以奏請江南開辦以杜漏卮奉旨俞允用費購器造屋至三十餘萬元於二十三年十二月開局以收利權甫辦年餘獲利十

劉坤一  
致省  
三  
省  
合鑄  
銀元  
祇抵  
外幣  
必須  
另設  
京局  
電

餘萬元嗣因各省設局參差不齊於二十五年五月奉旨歸併粵鄂製造以江南已著成效又奉旨接辦兩年獲盈餘二十餘萬以之抵銷用費所差不多旋坤一交卸停辦本年四月又復開辦每月約銷百萬元現在三局均已通行且江南本仿鄂粵所用化學洋員即由匯豐代覓一切認真經理萬不可停以塞利源京局前購機器現存上海久擱必壞畿輔重地宜廣行鑄造制錢以便民用三局祇銷沿江沿海以敵洋元若搭解餉項過多殊恐不敷周轉北京必須另開一局又銀元向係隨時估價如徵收等項仍可聽其照價收納如准搭解司庫價值既難強同核數恐多窒礙此後配銷成數宜斟酌可行則行不宜勉強上諭江南鑄造銀元向著成效著劉坤一飭局仍行認真鼓鑄與張之



變動李鴻章致電英兵之駐英兵之說請確實考證電

洞陶模斟酌妥善請旨辦理

十一日 駐蹕西安府城

全權大臣電信 佳電悉六月杪以後英使不但無照會長江一帶駐兵之說並未有此議不知江鄂從何處傳聞至英俄猜忌素深東三省俄約英未必不關懷然從無一語詢及豈能遽動照會自冬及春各處皆以效尤二字吠聲吠影聳動上聽究竟所欲效尤者何事請隨時確實考證勿使浮言徒亂人意

十二日 駐蹕西安府城

李盛鐸電信 小村歸任外部駐華使臣改派內田康哉請代奏鐸蒸

十三日 駐蹕西安府城

劉坤一奏  
籌款莫如  
墾斤加價  
請飭各省  
一律照加  
電

劉坤一電奏 目前最急之事實以籌款爲第一宗而籌款之公溥者則莫如鹽斤加價但兩淮加價已非一次實較各省爲昂惟舍此既乏鉅款可籌而辦法不能不求其劃一現酌中衡定擬每斤加商價三文查淮鹽行銷五省處處與鄰鹽交涉此時淮價既重若再淮鹽加價而鄰鹽不加則淮太偏重必爲鄰鹽暗侵不僅商本有虧亦於國課有礙若云加價難敵私販不知私販既無課釐官私價本懸殊現未加價豈能杜絕私鹽似未可因噎廢食致誤籌款之機事關各省非蒙朝廷一力堅持勢必渙散無成如蒙俞允請電飭各產鹽省分一律照加以免偏重

軍機大臣面奉諭旨交戶部本日劉坤一電奏鹽斤一律加價請飭令

各產鹽省分一律照加等語著戶部議奏

十四日 駐蹕西安府城

全權大臣電信 醇王電奉旨令回華德皇甚喜禮待有加現擬本月十九日動身九月可抵滬

十五日 駐蹕西安府城

全權大臣李鴻章等奏妥籌本章辦法摺

上諭李鴻章等奏妥籌本章辦法一摺據稱向例各項本章均由內閣票擬進呈其請補請署各項本件必候進呈出科後始行遵旨辦理擬請嗣後凡屬缺分題本改題爲奏以免積壓其餘本章照舊票擬進呈等語內外各衙門一切題本多屬繁複現在整頓庶政諸事務去浮文

嗣後除賀本仍照常恭進外所有缺分題本及向來專係具題之件均著改題爲奏其餘各項本章即行一律刪除將此通諭知之

十六日 駐蹕西安府城

直隸藩司周馥電稟直隸全境土匪已肅清地方安堵請代奏

慶親王奕劻等奏雍和宮現已於十四日交還謹派妥員點驗現存物件摺

十七日 駐蹕西安府城

張之洞奏請赴汴迎駕摺奉旨毋庸前來

十八日 駐蹕西安府城

臣奕劻臣李鴻章奏爲照錄畫押條款全文繕單恭摺仰祈聖鑒事竊

臣等前將總結條款摘要電奏奉旨公約業已定議卽行畫押欽此茲已於七月二十五日會同畫押查臣等上年奉命議和始而各使竟將開議照會駁回幾莫測其用意之所在嗣於十一月初一日始據送到和議總綱十二款不容改易一字臣等雖經辦送說帖於各款應商之處詳細開說而各使置若罔聞且時以派兵西行多方恫喝臣等相機因應筆禿唇焦卒以時局艱難鮮能補救撫衷循省負疚良深所有一切辦理情形均隨時電陳摺奏及至商定總結條款各使猶必須候懲處各省教案牽涉人員奉旨始肯畫押今雖將京城內外撤兵日期填註約內而各國在天津所設暫理地方之都統衙門仍復不肯遽撤各使有俟奉天牛莊交還時一體交還之說容少遲再行設法另案磋商

以期早日收回免多窒礙臣等伏查近數十年內每有一次構釁必多一次喫虧上年事變之來尤爲倉猝創深痛鉅薄海驚心今和議已成大局少定仍望我朝廷堅持定見外修和好內圖富強或可漸有轉機譬諸多病之人善自醫調猶恐或傷元氣若再好勇鬪很必有性命之憂矣樓樓之愚伏祈聖明垂察除將畫押約本咨送外務部收存俟回鑾後再行進呈御覽外所有照錄條款全文緣由理合恭摺馳陳伏乞皇太后皇上聖鑒謹奏光緒二十七年八月初十日發十八日到

謹將會同畫押公約十二條照繕清單恭呈御覽

大德欽差駐劄中華便宜行事大臣穆默 大興欽差駐劄中華便宜行事全權大臣齊幹 大比欽差駐劄中華便宜行事全權大臣姚士

登 大日欽差駐劄中華全權大臣葛絡幹 大美欽差特辦議和便  
宜全權大臣柔克義 大法欽差全權大臣駐劄中國京都總理本國  
事務便宜行事鮑渥 大英欽差便宜行事全權大臣薩道義 大義  
欽差駐劄中華大臣世襲侯爵薩爾瓦葛 大日本欽差全權大臣小  
村壽太郎 大和欽差駐劄中華便宜行事全權大臣克羅伯 大俄  
欽命全權大臣內廷大夫格爾思

大清欽命全權大臣便宜行事總理外務部事務和碩慶親王 欽差  
全權大臣便宜行事太子太傅文華殿大學士北洋大臣直隸總督部  
堂一等肅毅伯李鴻章

今日會同聲明核定大清國按西歷一千九百年十二月二十二日即

中歷光緒二十六年十一月初一日文內各款當經大清國大皇帝於西歷一千九百年十二月二十七日即中歷光緒二十六年十一月初六日降旨全行照允足適諸國之意妥辦

第一款 一大德國欽差男爵克大臣被戕害一事前於西歷本年六月初九日即中歷四月二十三日奉諭旨欽派醇親王載灃爲頭等專使大臣赴大德國大皇帝前代表大清國大皇帝暨國家惋惜之意醇親王已遵旨於西歷本年七月十二日即中歷五月二十七日自北京起程

第一款 二大清國國家業已聲明在遇害處所豎立銘誌之碑與克大臣品位相配列敘大清國大皇帝惋惜兇事之旨書以辣丁德漢



各文前於西歷本年七月二十二日即中歷六月初七日經大清國欽差全權大臣文致大德國欽差全權大臣現於遇害處所建立牌坊一座足滿街衢已於西歷本年六月二十五日即中歷五月初十日興工

第二款 一懲辦傷害諸國國家及人民之首禍諸臣將西歷本年二月十三三十一等日即中歷上年十二月二十五本年正月初三等日先後降旨所定罪名開列於後端郡王載漪輔國公載瀾均定斬監候罪名又約定如皇上以爲應加恩貸其一死即發往新疆永遠監禁永不減免莊親王載勛都察院左都御史英年刑部尙書趙舒翹均定爲賜令自盡山西巡撫毓賢禮部尙書啟秀刑部左侍郎徐

承煜均定爲即行正法協辦大學士吏部尙書剛毅大學士徐桐前四川總督李秉衡均已身故追奪原官即行革職又兵部尙書徐用儀戶部尙書立山吏部左侍郎許景澄內閣學士兼禮部侍郎銜聯元太常寺卿袁昶因上年力駁殊悖諸國義法極惡之罪被害於西歷本年二月十三日即中歷上年十二月二十五日奉上諭開復原官以示昭雪莊親王載勛已於西歷本年二月二十一日即中歷正月初三日英年趙舒翹已於二十四日即初六日均自盡毓賢已於二十二日即初四日啟秀徐承煜已於二十六日即初八日均正法又西歷本年二月十三日即中歷上年十二月二十五日上諭將甘肅提督董福祥革職俟應得罪名定讞懲辦西歷本年四月二十九

六月初三八月十九等日即中歷三月十一四月十七七月初六等日先後降旨將上年夏間兇慘案內所有承認獲咎之各外省官員分別懲辦

第二款 二西歷本年八月十九日即中歷二十七年七月初六日上諭將諸國人民遇害被虐之城鎮停止文武各等考試五年

第三款 因大日本國使館書記生杉山彬被害大清國大皇帝從優榮之典已於西歷本年六月十八日即中歷五月初三日降旨簡派戶部侍郎那桐爲專使大臣赴大日本國大皇帝前代表大清國大皇帝及國家惋惜之意

第四款 大清國國家允定在於諸國被污瀆及挖掘各墳塋建立滌

垢雪侮之碑已於諸國全權大臣會同商定其碑由各該國使館督建並由中國國家付給估算各費銀兩京師一帶每處一萬兩外省每處五千兩此項銀兩業已付清茲將建碑之墳塋開列清單附後

第五款 大清國國家允定不准將軍火暨專爲製造軍火各種器料運入中國境內已於西歷本年八月二十五日即中歷二十七年七月十二日降旨禁止進口二年嗣後如諸國以爲有仍應續禁之處亦可降旨將二年之限續展

第六款 按照西歷本年五月二十九日即中歷四月十二日上諭大清國大皇帝允定付諸國償款海關銀四百五十兆兩此款係西歷一千九百年十二月二十二日即中歷光緒二十六年十一月初一

日條款內第二款所載之各國各會各人及中國人民之賠償總數  
甲四百五十兆係照海關銀兩市價易爲金款此市價按諸國各金  
錢之價易金如左

海關銀一兩即德國三馬克零五五即奧國三克勒尼五九五即美  
國圓零七四二即法國三佛郎克七五即英國三先零即日本一圓  
四零七即荷蘭國一弗樂林七九六即俄國一魯布四一二俄國魯  
布按金平算即十七多理亞四二四此四百五十兆按年息四釐正  
本由中國分三十九年按後附之表各章清還本息用金付給或按  
應還日期之市價易金付給還本於一千九百零二年正月初一日  
起一千九百四十年終止還本各款應按每屆一年付還初次定於

一千九百零三年正月初一日付還利息由一千九百零一年七月初一日起算惟中國國家亦可將所欠首六個月至一千九百零一年十二月三十一日之息展在自一千九百零二年正月初一日起於三年內付還但所展息款之利亦應按年四釐付清又利息每屆六個月付給初次定於一千九百零二年七月初一日付給

乙此欠款一切事宜均在上海辦理如後諸國各派銀行董事一名會同將所有由該管之中國官員付給之本利總數收存分給有干涉者該銀行出付回執

丙由中國國家將全數保票一紙交付駐京諸國欽差領銜大臣手內此保票以後分作零票每票上各由中國特派之官員畫押此節

以及發票一切事宜應由以上所述之銀行董事各遵本國飭令而行

丁付還保票財源各進款應每月給銀行董事收存

戊所定承擔保票之財源開列於後

一 新關各進款俟前已作爲擔保之借款各本利付給之後餘剩者又進口貨稅增至切實值百抽五將所增之數加之所有向例進口免稅各貨除外國運來之米及各雜色糧麵並金銀以及金銀各錢外均應列入切實值百抽五貨內

二 所有常關各進款在各通商口岸之常關均歸新關管理

三 所有鹽政各進項除歸還前泰西借款一宗外餘剩一併歸入

至進口貨稅增至切實值百抽五諸國現允可行惟須二端

一 將現在照估價抽收進口各稅凡能改者皆當急速改爲按件抽稅幾何定辦改稅一層如後爲估算貨價之基應以一千八百九十七八九三年卸貨時各貨牽算價值乃開除進口稅及雜費總數之市價其未改以前各該稅仍照估價徵收

二 北河黃浦兩水路均應改善中國國家即應撥款相助增稅一層俟此條款畫押日兩箇月後即行開辦除在此畫押日期後至遲十日在途間之貨外概不增抽

第七款 大清國國家允定各使館境界以爲專與住用之處並獨由使館管理中國人概不准在界內居住亦可自行防守使館界線



於附件之圖上標明如後東面之線係崇文門大街圖上十十一十二等字北面圖上係五六七八九十等字之線西面圖上係一二三四五等字之線南面圖上係十二一等字之線此線循城牆南址隨城梁而畫按照西歷一千九百零一年正月十六日即中歷上年十一月二十六日文內同後附之條款中國國家應允諸國分應自主常留兵隊分保使館

第八款 大清國家應允將大沽礮臺及有礙京師至海通道之各礮臺一律削平現已設法照辦

第九款 按照西歷一千九百零一年正月十六日即中歷上年十一月二十七日文內後附之條款中國國家應允由諸國分應主辦會

同酌定數處留兵駐守以保京師至海通道無斷絕之虞今諸國駐守之處係黃村廊房楊村天津軍糧城塘沽蘆台唐山灤州昌平秦王島山海關

第十款 大清國國家允定兩年之久在各府廳州縣將以後所述之上諭頒行布告

一 西歷本年二月初一日即中歷上年十二月十三日上諭以永禁或設或入與諸國仇敵之會違者皆斬

二 西歷本年二月十三三十一四月二十九八月十九等日即中歷上年十二月二十五本年正月初三十二月十一七月初六等日上諭一道犯罪之人如何懲辦之處均一一載明

三 西歷本年八月十九日即中歷七月初六日上諭以諸國人民遇害被虐各城鎮停止文武各等考試

四 西歷本年二月初一日即中歷上年十二月十三日上諭以各省督撫文武大吏暨有司各官於所屬境內均有保平安之責如復滋傷害諸國人民之事或再有違約之行必須立時彈壓懲辦否則該管之員即行革職永不敘用亦不得開脫別給獎敘以上諭旨現在中國全境漸次張貼

第十一款 大清國國家允定將通商行船各條約內諸國視為應行商改之處及有關通商各他事宜均行議商以期妥善簡易現按照第六款賠償事宜約定中國國家應允勸辦改善北河黃浦兩水路

其勸辦各節如左

一 北河改善河道在一千八百九十八年會同中國國家所興各工近由諸國派員重修一俟治理天津事務交還之後即可由中國國家派員與諸國所派之員會辦中國國家應付海關銀每年六萬兩以養其工

二 現設立黃浦河道局經管整理改善水道各工所派該局各員均代中國暨諸國保守在滬所有通商之利益預估後二十年該局各工及經管各費應每年支用海關銀四十六萬兩此數平分半由中國國家付給半由外國各干涉者出資該局員差並權責及進款之詳細各節皆於後附文件內列明



除第七款所述之防守使館兵隊外諸國兵隊卽於西歷一千九百零一年九月十七日卽中歷光緒二十七年八月初五日全由京城撤退並除第九款所述各處外亦於西歷一千九百零一年九月二十二日卽中歷光緒二十七年八月初十日由直隸省撤退今將以上條款繕定同文十二分均由諸國中國全權大臣畫押諸國全權大臣各存一分中國全權大臣收存一分西歷一千九百零一年九月初七日光緒二十七年七月二十五日在北京定立

旨寄奕劻李鴻章據奏照錄畫押條款全文繕單呈覽一摺覽奏已悉所稱各國在天津所設暫理地方之都統衙門不肯遽撤並有俟奉天津莊交還時一體交還之說現在和議業經畫押各國在津所設都統

衙門應一律撤回及早交還著奕劻李鴻章速行設法竭力磋商務期早日收回以免窒礙是爲至要

### 十九日 駐蹕西安府城

奕劻李鴻章致馬凱  
英派馬凱  
議商約請  
旨派盛宣  
懷會講電

全權大臣電信 英使薩道義照會按照和議條款整頓通商行船及更改進口稅則各事宜現由本國政府派印度官馬凱駐京官戈頒受爲督辦大臣英商老公茂公司德貞爲協辦大臣該三員十月初可到上海會議此事請將貴國所派與本國辦事大臣姓名開示以便達知云云查英使所請係應辦之事更改稅則從前屢議未成英既願辦東方商務英最大英允則各國易從是加稅一好機會盛宣懷熟悉商情上年奉旨派充會辦商務大臣一切必更留心考核該大臣當與聶緝

榮及赫德議辦此事擬請派盛宣懷爲辦理商稅事務大臣以資熟手  
赫德未能出京請派上海稅司戴樂爾漢口稅司賀璧理隨同會辦請  
代奏請旨

旨電奕劻李鴻章着派宗人府府丞盛宣懷爲辦理商稅事務大臣議  
辦通商行船各條約及更改進口稅則一切事宜並着就近會商劉坤  
一張之洞妥爲定議稅務司戴樂爾賀璧理均隨同辦理  
慶親王奕劻等奏京城內外交清謹陳布置情形摺

胡燏棻奏聯軍退盡調姜馬兩軍分紮京師內外情形摺

二十日 駐蹕西安府城

盛宣懷奏上海華廠機器紡線歷年虧累亟圖招商接辦摺



戶部奏新  
定賠款數  
鉅期迫亟  
宜合力通  
籌摺

二十一日 駐蹕西安府城

松壽奏黃河以南教案議結並賠款數目摺

戶部謹奏爲新定賠款數鉅期迫亟宜合力通籌分派攤還以期無誤  
大局恭摺仰祈聖鑒事據全權大臣先後來電並送還款表一紙計此  
次賠款議定四萬五千萬兩前數年每年本利銀一千八百八十二萬  
九千五百兩嗣後按年遞加每年二千餘萬兩及三千餘萬兩不等至  
三十九年爲止總共本利銀九萬八千二百二十三萬八千一百五十  
兩另有允緩半年付利息銀九百萬兩分三年帶交由西歷明年正月  
初一日卽華冬月二十二日起照付是款目之鉅曠古罕聞限期之迫  
轉瞬卽屆就中國目前財力而論實屬萬不能堪然和議旣成賠款已

定無論如何窘急必須竭力支持臣部職司度支固屬資無可卸各省值此艱鉅尤當勉爲其難亦惟有於出款力求裁減入款再求加增庶幾湊集鉅款屆期歸償於大局不至貽誤謹將擬裁擬增各款逐一開列恭呈御覽

一、虎神營驍騎營護軍營光緒二十五年共開支津貼銀一百四十餘萬兩此項津貼原因添練各營始行加增並非兵丁底餉現擬自本年一起即將各該營加增津貼銀兩照數裁減

二、神機營經費及步軍營練兵口分抽練兵丁口分光緒二十五年共開支一百二十餘萬兩前項經費口分係屬挑練各營兵丁先後加增之款亦非兵丁底餉現擬將該營加增經費口分銀兩酌量裁減

其如何分別辦理之處應俟回京後由該管營王大臣妥議籌辦

一、滿漢官員八旗兵丁向有米折一項每年由部庫約支銀一百餘萬兩此項米折係按例價折減支給計官員俸米折銀每員每季所得不過數兩兵丁甲米折銀每名每季所得不過一兩上下是分之自屬無多而合之便積有成數擬自本年起將前項米折銀兩暫行停支

一、南洋經費及沿海沿江防費並各省水陸勇營練營舊有綠營率多事涉虛糜難期實際擬一律酌加裁汰

一、房間捐輸按糧捐輸廣東已電奏開辦如果安定章程辦有端緒尙屬籌款大宗擬通行各省一體酌量試辦

一、地丁收錢酌提盈餘剔除中飽山東已准辦理臣部亦鈔錄原奏行

令各省仿照現擬再行通飭各省切實遵辦

一、鹽觔加價前已奏明辦理有案然爲數尙少款項亦均已撥用擬令各省就現在鹽觔價值每觔再加增四文

一、各省土藥一項茶糖菸酒四項非民生日用所必需重徵尙無甚妨礙擬令就現在抽釐數目再加抽三成

統計部庫裁減之款可省三百餘萬兩各省裁減及增加之款約略估計亦當有一千數百萬兩惟各省情形不同未必皆能逐款遵辦即使遵照部章實力籌辦而款項湊齊尙需時日仍恐有誤還期擬先就賠款二千二百萬兩之數令各該省關將應解部庫西征洋款改爲加放俸餉一款抵閩京餉改爲加放俸餉一款京官津貼改爲加復俸餉一

款自光緒十二年起裁減營勇作爲旗兵加餉一款自光緒二十四年起加增邊防經費一款向來有漕省分循案解部漕折一款以上約共銀三百餘萬兩全數提出均留作賠款外尙有一千八百餘萬兩即攤派各省責令按期報解其數目如何分別應按省分大小財力多寡爲斷擬派江蘇省二百五十萬兩四川省二百二十萬兩廣東省二百萬兩浙江省一百四十萬兩江西省一百四十萬兩湖北省一百二十萬兩安徽省一百萬兩山東省九十萬兩河南省九十萬兩山西省九十萬兩福建省八十萬兩直隸省八十萬兩湖南省七十萬兩陝西省六十萬兩新疆省四十萬兩甘肅省三十萬兩廣西省三十萬兩雲南省三十萬兩貴州省二十萬兩計共一千八百八十萬兩各省自奉文派

定以後應均按臣部單開裁減加增各辦法妥速籌辦倘單開各條內有與該省未能相宜及窒礙難行之處各該督撫均有理財之責自可因時制宜量爲變通並准就地設法另行籌措惟必須在本省司關道局湊足分派之數如期匯解不得短少遲延致有貽誤倘期限已屆而短欠尙多卽惟各該督撫是問再通商各海關稅銀擬收足值百抽五現已商辦有成將來開辦後核計關稅究能徵收若干應將增出數目專爲賠款應用各省此次分攤之數尙可酌量核減所有新定賠款臣部擬合力通籌分派攤還各緣由是否有當伏祈皇太后皇上聖鑒再此摺係行在戶部主稿合併聲明謹奏奉旨依議

李鴻章電信 調羅豐祿使俄方謂得人詎格使告知外部覆電羅與

部拒絕羅  
豐祿使俄  
電

英官商親密新近曾有毀俄之辭恐於邦交有礙鴻告以謠言不足信  
羅從事久深知其必無他屬轉達但英俄猜忌已深未知能釋疑否謹  
電聞

懿旨自經播越一載於茲幸賴社稷之靈還京有日臥薪嘗膽無時可  
忘推積弱所由來歎振興之不早近者設立政務處集思廣益精擇羣  
言逐漸施行仿西法之善者不難舍己從人救中法之敝者統歸實事  
求是數月以來興革各事業已逐漸施行或條目繁重須待講求或事  
屬創舉須加參酌回鑒以後尤宜分別緩急銳意圖成茲據政務處大  
臣榮祿等面奏變法一事關係甚重請重申誠諭示天下以朝廷立意  
堅定志在必行並飭政務處隨時督催務使中外同心協力期於必成

用是特頒諭旨嚴加責成爾中外臣工須知國勢至此斷非苟且補苴所能挽回厄運惟有變法自強爲國家安危之命脈亦即中國一線之轉機予與皇帝爲宗廟計爲臣民計舍此更無他策爾諸臣受恩深重務當將應行變通興革諸大事力任其難破除積習以期補救時艱昨據劉坤一張之洞會奏變法各條事多可行即當按照所陳隨時設法擇要舉辦各省疆吏亦應一律通籌切實奏行大要不外言歸於實用得其人予與皇帝宵旰焦勞母子一心力圖興復百折不回大小臣工其各實力奉行以稱予意將此通諭知之

二十二日 駐蹕西安府城

劉坤一張之洞奏東三省請開門通商摺



旨寄劉坤一張之洞據奏東三省要盟貽害惟開門通商可以轉危爲安一摺所陳辦法具見苦心朝廷於此事所夕焦思苦無良策俄主心懷叵測誠如該督等所慮但東三省俄人尙未交還今遽將俄約宣請各國會議必致激怒決裂東三省又大遭鋒鏑更恐震驚陵寢是通商未成而鉅禍立至勢將不可收拾彼時各國卽能爲我發抒公論必不能爲我以兵力向阻又將何以爲計且原奏亦稱俟聲明俄人何日交還我卽開門通商今並未交還而遽宣此說豈非徒以空言先受實禍此事關繫甚重該督等當再按照所諭各節詳細妥籌善策迅速密奏總期不至使俄怒而決裂利未形而害已至是爲切要

二十三日 駐蹕西安府城

呂海寰奏遵旨派員前赴南洋各島曉諭僑寓華民摺奉旨知道了現在和約大定著即將議設領事一節切實磋商務期必成

又奏德使克林德之母懇辭致祭片

二十四日 由西安啟鑾

辰正二刻自西安行宮啟鑾闔城文武官吏均先於宮門外齊集伺候升輿辰初三刻前導馬隊出城太監次之各親貴王公大臣又次之長安父老在南門外祇候跪送出城後繞赴東關詣八仙庵拈香進膳畢出南門行二十里至灊橋驛館又二十里駐蹕臨潼縣驪山行宮

二十五日

行二十里新豐鎮館

屬臨潼

二十里零口鎮駐蹕

李盛鐸電信

頃外部小村言前在京與各使議款屢思將東三省事

部謂俄約  
緩議爲是  
電

西巡大事記卷十

一三二

料附刊之一

歸入公約因無機會未能辦到東三省事中國萬勿求速則將來結局必好至中國前因日本協助言明俄有他議彼此關照日本政府極看重此言俄如再議中國自通知日本即中國自與俄開議亦望先與日本籌商以保東方大局此層請代電達中國政府等語談次並將此層鈔一說帖相示鐸問責俄撤兵何時可辦彼答俟回鑾後天津兵撤即可詰俄鐸問津兵何時可撤彼答此事固難預定然曾密探各國尙無久駐意大約回鑾後地方安靜即可陸續撤去至京津日本兵現共四千一月內再撤千六百名所以未全撤者因全撤則此後不便向各國開口稍留方可隨時勸彼同撤此中情形中國當能原諒云云謹電聞

盛鐸漾

李鴻章奏  
東三省事  
俄使送商  
改約稿全  
文電

二十六日 行二十里新店鎮屬渭南二十里渭南縣城駐蹕

李鴻章電奏 先是俄格使與鴻婉商東三省約事謂俄主已定之約

不能更易即商改亦無多鴻告以朝廷實欲敦睦誼但須將我兵權利  
權及自主之權不損庶他國不至效尤屬其電商政府設法改妥勿因  
前約未盡之嫌致敗全局格遵即電詢去後鴻因病三旬假滿往拜新  
使雷薩爾據稱俄主念兩國交誼令外部商改當晚將約稿送閱文曰  
大俄國皇帝與大清國皇帝願將一千九百年在中國生出之變亂所  
傷鄰交復行完固遣派全權大臣商議東三省各條

一俄主願彰明與中國大皇帝和睦及交誼之新據而不願由東三省  
與俄國交界各處開仗攻打俄國安分鄉民各情尤在東三省各地歸

復中國權勢並將該地方一如俄軍未經佔據以前仍歸中國版圖及中國官治理

二大清國國家今自接收東三省自行治理之際申明與俄華銀行於俄歷一千八百九十六年八月二十七日所立合同各條永遠堅守並按照該合同第三條承認極力保護鐵路及在該鐵路職事各人並分應保護在東三省所有俄國所屬各人及該人各事業大俄國國家因有大清國國家所認以上各情允認如果再無變亂並他國之舉動亦無牽制即將東三省俄國所駐各軍陸續撤退其如何撤退開列於後

甲本年撤盛京西南段至遼河所駐俄國軍並將各鐵路交還中國

乙明年二年之間撤退盛京其餘各段之軍

丙三年之間查看能否撤退其餘之吉江兩省所駐之俄軍

三大清國與俄國爲免去年變亂紛來再行復熾且此變亂皆屬中國駐紮於俄國交界各省之官兵今令各將軍與俄國兵官會商東三省中國兵隊駐紮之數目及處所中國允認除將軍與俄兵官籌定兵數外中國不另添練兵及派兵前往東三省蓋因中國如在各該省多養兵隊俄國在交界處自亦不免加添兵隊以致兩國無益尙加增養兵之費也至如東三省安設巡捕兵及綏靖地方等事除指給中國東三省鐵路公司各地段外專由各省將軍教練中國步捕隊以充巡捕之職該兵不准用礮

四俄國允自一千九百年九月底起被俄軍佔據並保守之山海關營

口新民廳各鐵路交還本主大清國國家相應允許

一 他國軍隊不得保護所交還各鐵路並不得或修或養他國軍隊亦不得佔據俄軍所退各地段設有應行保護情節則專責成中國護衛隊而已

二 修完並養路各節必確照俄國與英國一千八百九十九年四月十六日所定和約及按照一千八百九十八年九月二十八日與公司所出修該鐵路借款合同辦理此外該公司應遵照所出各結不得佔據或藉端經理山海關營口新民廳鐵路

三 大俄國未經允許不得在東三省南段續修鐵路或修枝路亦不得在營口之遼河建造橋梁並不得將此地所有中國鐵路之盡

頭處遷移

四 應將大俄國國家交還山海關營口新民廳各鐵路所有重修及養路各費賠償

以上四條似於國家自主權利尙無所損內第三條令各將軍與俄國武官會商籌定兵數及駐紮處所此不便由京遙度應電外部刪改該使恐政府不允候電商再定此外皆前此允行之件較前議十一條更爲大方向京造路一節竟不再提尤免後患所稱不得在東三省南段續修鐵路或修枝路此對英國而言將來交修鐵路後應責令與英公司原議之胡燏棻督辦至關外鐵路重修養費計尙不多俟其查明再議至東三省礦利難靳勿與俄外部派劉巴已與吉林定約俄戶部又



派俄華銀行商辦此事均是中俄合辦之局另再籌議請代奏李鴻章敬

旨電奕劻李鴻章現擬改俄約語意較前和平自是該王大臣婉切相商之力其約內處處防他國干預亦與中國恐他國效尤之意相同此事關係甚重必須逐細妥籌設俄約甫定而他國即藉口枝節橫生又將何以爲計該王大臣等仍當仰體朝廷勢處兩難之意熟思審處勿使他國因而效尤明晰具奏再行候旨定議爲要至兵數及駐紮處所亦須界限分明不失自主之權爲要

二十七日 行二十五里華州城駐蹕

慶親王奕劻奏請到河南省城迎鑾摺

劉坤一  
樞垣據日  
領電俄使  
與李相協

旨寄奕劻著即前來河南迎駕其總理外務部事務著李鴻章暫署

二十八日 行二十里柳子鎮三十里敷水鎮用茶三十

### 里華陰縣城駐蹕

信恪奏鄂託克等旗辦結教案安定條約摺

又奏查明蒙古諸傳仇教並塔拉特王戕教案情摺奉旨知道了著將塔拉特王一案迅速持平辦結嚴禁謠言以弭後患

二十九日 駐蹕華陰縣城

皇太后駕詣華山之麓玉泉院拈香

劉坤一電信 頃接駐滬總日本領事小田切電稱奉駐京署理欽差電開東三省一事確聞日前李中堂與俄使密商俄使要求俄於年內

定密款祈  
確查電

那桐奏赴  
日廣送杉  
山彬祭葬  
銀兩並賜

將東三省歸還中國俄兵在盛京者年內撤退在吉林黑龍江者訂約  
日起限二年撤退三省籌兵由盛京將軍與俄兵官商辦禁用大礮又  
風聞中堂辦事甚密不與慶邸商尤恐江鄂聞之攔阻等因查東三省  
事近無所聞就日本總領事來電所云吉江兩省二年內始撤兵及練  
兵與俄商過流弊甚大勢難照允確否雖不敢知事關重要特電聞津  
沽及上海洋兵不撤亦難保不以俄事爲標準也坤勅

九月初一日 五里華陰廟餽三十五里潼關廳駐蹕

初二日 駐蹕潼關廳

那桐片 再上年閏八月初三日欽奉上諭大日本國駐京使館書記  
生杉山彬倉猝被戕實深軫惜著派侍郎那桐前往致祭並賞給銀五

千兩用示篤念邦交惋惜不忘之至意等因欽此當經全權大臣慶親王奕劻大學士李鴻章恭錄照會日本駐京使臣西德二郎欽遵時適杉山彬靈柩先已回國應行致祭禮節未及舉行迨奴才奉命專使日本復經慶親王奕劻大學士李鴻章照會日本接任使臣小村壽太郎議將頒賞杉山彬祭葬銀五千兩由奴才齎交該國外務大臣轉交杉山彬家屬祇領並俟奴才呈遞國書禮成後親赴杉山彬墓次致祭以表國家惋惜之意准小村壽太郎覆稱已轉達外務大臣查照茲奴才行抵日本當將庫平銀五千兩備函送交外務大臣察收並定於八月初二日舉行賜祭典禮外務大臣傳知杉山彬家屬遵照奴才屆期前往杉山彬墓次該家屬先已在彼祇候外務部各員亦均到彼照料奴

才謹即遵旨奠醑並向該家屬宣示朝廷德意該家屬感戴皇仁再三稱謝殊恩異數光被遠人足副聖主篤念邦交之至意所有奴才遵旨致祭杉山彬緣由謹附片覆陳伏乞皇太后皇上聖鑒謹奏光緒二十七年九月初二日奉硃批知道了

奕劻李鴻章致楊儒稱  
東省事俄京商辦電

全權大臣電信 滬密頃接楊使電稱外部已歸談次稱東省事伊不願重提如我催商伊亦不願與議現公約已定即日回鑾應在京商辦以歸簡捷已面授雷薩爾訓條惟經此遷延耗費不資答以中國本願早了上次乃他國牽制伊云若他國再預此事當立即罷議儒勸以兩大連界宜謀永久相安彼此有益伊復稱今係私談請密存勿宣云又吳克稱現外戶部實無他意明年兵部查勘鐵路須遊滿洲歸恐別有

劉坤一  
致俄約  
撤兵及  
限制均  
制我兵  
礙主權  
勿礙電  
簽押請

布置合併密聞乞鈞裁代奏云奕劻李鴻章冬

### 初三日 駐蹕潼關廳

劉坤一電信 頃見全權敬電奏與俄雷使所議約稿雖較前約和平其分年撤兵及中國兵數駐處均須由將軍與俄國兵官籌定並捕兵不准用礮各節與日領日前來電相符不獨盛京俄兵須分今明兩年撤退已慮時遠且吉黑兩省俄兵更須遲行第三年尤須查看能否撤退語尤含混屆時萬一彼謂未便撤退事有成約即難商撤更慮此約一經照允宣布各國津滬之兵亦必效尤不撤共視俄兵以爲進退況所謂主權者以其一切政治皆能自主今兵數駐處皆須與彼籌定並不准用礮皆有礙主權之確據均萬不可允者查東三省一事當初次

議約之時其要挾恫喝幾若一字不可商改乃蒙朝廷堅持迫於各國公論一再自爲轉圜其不能獨逞強佔技窮可見日本始終允爲相助誠以事關東方大局與彼亦復休戚相共故歷次來電皆囑與俄商議必先知照日前李使濛電所述日外部語尤爲切實並中國萬勿求速結局必好又謂俟回鑾後即可詰俄撤兵非獨彼國於茲籌之已熟即俄亦知回鑾後再不撤去東三省之兵難逃公論故亟亟專乘此時復伸前議冀得執約以杜各國之口一墮其計豈第從此受俄之禍亦慮日本移詰俄之力轉而責我後患更無底止此皆意中之事不能不慮目下旣不便以與俄所商告知日本若俄不能悉照未佔據以前辦理惟有暫作宕計不即簽約徐俟機會伏候聖裁乞代奏坤一冬

盛宣懷致  
全權大臣  
中英會議  
商約乞奏  
發文憑電

奕劻李鴻  
章奏請派  
胡燏棻為  
關內外鐵  
路大臣電

初四日 駐蹕潼關廳

盛宣懷電信 英派商約大臣將到聞英廷給有文憑宣懷已奉電旨  
未奉明文兩國會議事件例須換看文憑應否奏請行在寄一諭旨以  
免臨時因此稽延乞鈞裁宣懷叩支

初五日 行五里抵河南界之第一關二十五里關底鎮

鄉縣駐蹕

初六日 行二十里盤頭鎮

屬關鄉縣

二十里關鄉縣駐蹕

全權大臣電奏 頃據英薩使函稱本年四月二十日曾探詢日後將  
鐵路歸還中國擬派何員督辦函致在案茲雖鐵路歸還尙非其時然  
回鑾在即亦用自蘆溝橋至馬家堡鐵路如派鐵路督辦大臣將蹕路



之事商妥尙有鐵路他事亦可會同相助將來交還鐵路時有通達事宜之大員接收經理尤爲殷盼擬請從速奏保督辦一員與本國武官將蹕路一切工程及關繫鐵路他事一并妥商是爲切要云云查津榆鐵路自許景澄故後久無督辦今和議已成鐵路必須收回茲英使以商辦回鑾蹕路工程與關繫鐵路他事請奏保大員督辦正可乘機利導候補侍郎胡燏棻素能與英人聯絡且自山海關外至新民廳鐵路俄人現議交還該路本係胡燏棻借英款興造尙未竣工如蒙簡派該侍郎爲關內外鐵路大臣必能一氣聯絡請旨遵行

旨電奕劻李鴻章現在和約已定津榆鐵路自應即時交還英使函所云尙非其時不知將何所待又定於何時歸還又云蹕路工程外尙有

增祺致樞  
垣東三省  
俄人包括  
利權漸逼  
漸緊已與  
磋商函

關繫鐵路他事亦可並商所指他事又係云何著該王大臣等確詢電覆並切實商定將鐵路趕緊收回至所請簡派大員胡燏棻現辦善後一切事宜勢難兼顧着派外務部侍郎徐壽朋仍與張翼會同辦理即將收回鐵路事宜飭令悉心商議爲要

增祺致軍機大臣函 敬肅者東三省均爲根本重地然情勢不同黑龍江僻在一隅地廣多荒吉林除與俄連界外只瑯春一線略與朝鮮接壤而奉天南方濱海面者千餘里旅大爲渤海門戶乃通商要區山海關扼三省咽喉故上年聯軍入京俄則首先退兵以顧東三省而尤注意於奉天故所駐俄兵亦以奉省爲最多吉林次之黑龍江又次之計東省駐兵之處西則山海關錦州溝幫子新民廳南則旅順大連灣

魏子窩熊岳海城蓋平營口牛莊遼陽北則昌圖開原鐵嶺而以省城爲中權自劉彈子一役而東路通化之兵迄今未撤且有安設電綫之舉現據鳳凰廳稟報俄人又撥兵九百餘名已到海城駐紮大孤山等處亦有俄兵前往窺其意似係防備外侮等語此奉省情形有如是者又前准俄員照會欲仿吉林草約不准他國人入股開礦一事祺業已奏奉諭旨交全權大臣俟和議定後再議嗣後據鐵路總監工吉利時滿屢次來函並鈔來吉林改訂合同懇請照辦當查第二條所載開挖煤斤鐵路公司有獨擅之權如煤在鐵路兩旁三十里內或華或洋或華洋同辦欲行開採無鐵路公司應允均不准行三十里外如華人辦不必知照鐵路公司如他人或他項公司或華洋人同辦均須知照鐵

路公司公司不用始可允准等語再四通核此次合同雖係專指煤礦一項而言然亦未便擅與訂約又爲他日藉口乃彼一再催促隨一面派員赴吉林查對一面派員前往旅順與之婉商若指定一二處開採原可按照礦路定章辦理似此事關全省實難訂立合同該監工不悅又自春夏間該總監工及其陸軍提督屢請向省城另修枝路以便商務曾以距陵較近婉阻今則竟由陵邊直過竟爾興工是其包括利權大有不肯放手之勢又如向錦州地方索要人丁地畝錢糧各冊續挑大凌河馬匹以及令我代修鳳凰城山路等事不一而足頗有漸逼漸緊之勢除改修鐵路一事已電請全權設法勸阻並再與磋商外餘則只好耐心處之然其中種種折磨情形實屬莫可言罄惟盼大局早定

軍機處致  
劉坤一希  
詢日本於  
回鑾後果  
否代我詰  
俄撤兵電

不致別生枝節是爲至幸教案賠款前法主教減至二百七十萬兩英則六十餘萬復屢以直隸所屬賠款最少之處與之磋磨令其赴京商辦或可轉圜然亦無日不來催促值此艱局肆應乏才徒以口舌相爭實有智盡能索之慨耳

軍機處致劉坤一電信 冬電已進呈全權昨電奏俄事已有電旨飭再妥籌總期不致他國藉口生事方可定議來電謂回鑾後即可詰俄撤兵日本果能聯各國代中國詰俄撤兵自甚願宕延以待公論否則東三省竟不交還各國又不代詰俄撤兵遲則更受俄多方挾制愈難爲計仍望問明回鑾後果能詰俄撤東三省之兵否務得確情電覆請即與李使商之爲要樞魚

軍機處致  
全權大臣  
請與俄使  
逐條婉商  
更改新約  
電

劉坤一奏江浙冬漕改行海運辦法章程十二條摺

袁世凱奏東省漕運一律改折運費浮費一律歸公摺

初七日 行二十里楊家灣館屬團鄉二十里古村驛進茶二

十五里靈寶縣城駐蹕

初八日 駐蹕靈寶縣城

軍機大臣致全權大臣電信 俄約一事朝廷深賴蕪籌此次訂約中國斷不聽他國之干預亦深防他國之干預欲杜干預必須兩國訂一和平正大之約既定之後可以宣布令各國無所藉口中俄兩國乃可永遠相安祿等數日來反覆籌思謹就管見所及專電密陳伏惟鈞察一第三年須查看吉江兩省情形再行撤兵云云此節無非爲保護鐵

路起見楊使第二次所改條約內載從前東省鐵路公司合同內有派兵保護之條現因上年之亂須添留兵隊至地方平靖而止與此意同查從前東省鐵路公司合同內既有允俄派兵保護之條此時自難阻止惟明言吉江兩省撤兵須俟第三年查看情形再定適予人以口實應與俄使商議請將吉江兩省與盛京全省俄兵及早一併撤退另立專條載明東三省已成之鐵路所有保護彈壓章程中俄兩國查照某年月日所訂公司合同由公司與三省將軍會商辦理云云如此則俄國派兵保護係照舊日合同應派兵數多寡另與東省將軍商辦不必提明致與此次交地退兵牽混致啟他國疑忌

一中國三省兵數與駐紮處所與俄兵官籌商一節尊電云已屬俄使

電商外部刪改是此條之難允已在洞鑒查上年東三省啟釁由於拳匪煽惑官兵以致開罪友邦中國自當認咎惟北京公約並無限我兵額專條今若明言兵數及駐紮地方均須與俄兵官籌商實於我自主之權有礙必爲各國所藉口若各國於各省皆執此條效尤則中國之權盡失中國此時財力匱乏正欲裁兵節餉與俄國永篤邦交三省與俄唇齒相依亦萬無備戰之理但三省馬賊鬍匪伏莽素多若無大枝勁旅預備分撥兜勦僅恃巡捕兵斷不足以建威銷萌應與俄使剴切商議與俄接界若干里以內中國不駐大枝兵隊應設馬步巡捕兵與俄商定數目及分紮處所一切章程均可照辦其三省腹地將來究竟應留兵若干及分紮處所此時尙難預定應俟交收三省之後人心大



定中國自當察酌餉源地勢安定新章既與俄國重敦睦誼總期彼此永遠相安自可將兵數及分紮處所隨時告知俄國此時不必明載交收條款內更爲大方至巡捕兵不准用礮自可遵照其三省腹地兵隊自不在內緣三省匪徒嘯聚山谷各有利器非有礮不足以資勦辦而壯聲威此乃實情並祈婉與俄使商明分晰言之是爲至要

軍機大臣致留京辦事大臣電信 公函敬悉鑾輿回京王公百官均在永定門內天橋迤南一帶跪迎至慈聖萬壽如在開封尙未啟蹕慶賀禮節自可照上年辦理

初九日 行二十里曲沃鎮饘

屬靈寶

二十五里橋頭溝進茶

十五里陝州城駐蹕

劉坤一  
致  
樞垣  
日允  
回鑾  
後詰  
俄撤  
兵電

內務府大臣世續奏遵旨料理回鑾各項差務摺

初十日 行三十里磁鐘鎮二十五里張茅鎮駐蹕

均屬  
陝州

太監趙進祥奏敦宜榮慶皇貴妃等請安摺奉旨知道了

十一日 行二十里硤石驛二十五里觀音堂駐蹕

均屬  
陝州

劉坤一電信 觀音堂行在軍機處由侯回鑾後津兵撤即可詰俄撤兵係日外部向李使言由李使濠電陳明鈞處承魚電囑詢確情當請李使切詢茲得覆電謂遵達外部據稱東三省一事於日本朝鮮關係甚重俟回鑾後天津兵撤日本自當聯英美各國責俄撤兵萬一各國意見不合日本利害所關不能坐視亦必獨詰俄催令撤兵還地緣俄曾布告各國言明並非永據三省俟中國有可靠之政府立定後當即

交還日本據此詰之並不爲難總之詰俄之事時機一到日本決無游移等語乞轉樞署云日答語可謂切實之至總之此事若不與彼利害相關去冬迄今豈肯如此爲我代籌切勸俄若可以久佔亦豈能復與我商改續約所議四條看似平常實則仍係暗奪主權久駐兵隊此即俄前告德國以後不用此策蓋不用強而用誘今日本既向我推誠切告若再墜俄計與之立約致礙於彼不獨日必反而責我亦恐各國共肆要求安危之機間不容髮此時惟有宕延以待公論不勝切禱坤卦

十二日 行二十里陰嶺鎮館

屬澠池縣

二十五里澠池縣城駐

蹕

十三日 行二十里石河鎮館二十五里義昌驛

均屬澠池

進茶

張之洞致  
樞垣籌款  
爲難惟有  
鹽斤加價  
電

## 二十里鐵門鎖

屬新安縣

駐蹕

張之洞電信 籌款爲今日急務數月焦思不獨賠款過鉅苦於無策而鄂省舊案洋款撥補鹽釐無著之款及新增加撥無著之款各約四十餘萬去年防務新增之款除極力裁汰不敷尙多且自強要政如興學練兵製械游歷各大端其勢不能不亟辦武昌爲各國屬目之區斷不能因循停緩致啟外人輕侮之心但鄂省枯窘萬分籌款亦非一項所能集事惟有先辦鹽斤加價較爲平允易行擬就鄂省境內籌計無論淮鹽川鹽如行銷湖北境內一律加價四文以爲撥補各項要款之需於未接部文之先早與撫藩以下議定前於八月內已與江督劉迭次商妥江省加釐三文歸產鹽之江省鄂省加價四文歸銷鹽之鄂省

敵處並已同時電商川督奎俊當經江督電奏告鄂頃准戶部咨因江督奏加淮釐三文行知各省照四文加增查江督奏聲明請旨飭產鹽省分一律照加所云產鹽省分係指川粵閩浙等省而言與湖北無涉湖北並不產鹽祇能銷鹽加價係取之於鄂省食戶即江省加釐雖令運商交納亦仍取之於銷鹽省分之食戶江省爲江籌款而加釐鄂固不便阻止鄂省爲鄂籌款而加價取之鄂民自與江省無涉日內擬卽具奏因准部咨恐奏到後部中或未能分晰故特電請代奏聲明鄂省加價四文仍當卽日速辦至江督所指產鹽省分之加價三文能否酌加應由產鹽省分籌議與鄂省加價另爲一事免致以鄂民多出之錢徒供他省之用庶幾新案賠款及舊日洋債抵補無著之款稍資補苴

張百熙奏  
請將國子  
監歸併大  
學堂摺附  
片二件

而自強新政亦可實力奉行至賠款大宗俟籌有辦法再行入奏

工部尙書張百熙奏現在朝廷欲圖自強而其最要首在培養人才往  
年京師設立大學堂因亂而廢臣愚擬請將該學堂改隸國子監國子  
監舊設南北兩學仿胡瑗以明經治事分課生徒大學堂則中西並課  
然輕其所重重其所輕用意不無一偏之弊夫國子監向稱太學太學  
者大學也一都之中豈容有兩大學重規疊矩意見參差此無怪學術  
之多歧而人才之不出矣欲救其弊莫如善定其制欲定其制莫如首  
定其名若將國子監衙門正名大學舉大學堂及南北兩學一併歸入  
卽就監署拓而廣之並請簡派管學大臣視從前總理之職應由政務  
處王大臣會同管學大臣悉心籌議並招集京外通博之才酌採中西

有益政治各種學問嚴定章程重在中學而以西學輔之實事求是十年之後必有人才出乎其間此今日第一要政也

張百熙片 同文館之設於今有年但取譯才而於西學精微概未講究是僅獵取皮毛耳擬請將同文館改隸大學并請簡派專員辦理提調事宜外務部事繁不必兼領所有肄業各生須講求中西有用之學不徒取其通曉譯事數年之後擇其學有根柢博通西政者充當繙譯官將來外務部司務及主事等官即以此項人員遞升而上亦培植人才之一道也

張百熙片 再翰林院爲清要之官而近來流弊專以講究詩賦工習小楷爲能事舉英髦碩彥敵精于小技之中甚非國家求才之道擬請

特設專官改滿漢學院學士爲尙書以領其事廢詹事府以詹事少詹事爲侍郎升講讀學士爲三品庶子以下並爲侍講侍讀等官尙書侍郎缺以次遞升不得以各部兼充調補講究經世之學一政學如官制賦稅禮儀律例兵政輿地農商之類一藝學如算學重學汽學鑛務聲光化電之類二者之學自講讀學士以下至於編檢庶吉士各視其性之所近爲之多置中外有用書籍及測量考驗諸器使之分門肄習立考課甄別之法由該管尙書詳加檢定請旨頒行所有鄉會試主考總裁以及管學大臣及將來之大學堂教習均可於其中揀用此亦培植人才之一道也

十四日 行三十里新安縣城駐蹕



奕劻李鴻章致電  
俄使顧我  
要求並聲  
明緩撤兵  
之故電

十五日 行三十里磁澗鎮餉

屬新安

十五里谷水埠

屬洛陽縣

進

茶三十五里洛陽縣城駐蹕

十六日 駐蹕洛陽縣城

十七日 駐蹕洛陽縣城

全權大臣電信 庚電均悉當將尊旨面告雷使渠笑罵不止謂又聽他國讒言橫生意見吉江兩省稍緩撤兵實因該地方馬賊鬍匪甚多本省兵餉兩絀力不能制姑令幫同彈壓俟主兵練成地方平靖定即如約撤退他國何至疑忌試問現由天津至山海關英法德日義留駐之兵幾時能撤恐吉江要撤時彼尚未撤尙能疑忌我耶三省兵數與俄官籌商俄外部覆電已准照改立約以後兩國和商主權無礙各省

無變亂之事亦不能執此條效尤此約是俄政府奏明俄皇商定若照來電分晰邊界及腹地辦法則前議四條當大刪改又是本年二月故智我斷不敢從云云鴻婉商請其電外部再行定議渠堅不允至江督電奏語多可笑謂迫於各國公論俄再自爲轉圜刻下除日本私議外各國並無公論勦等屢奉電旨與俄使商俄使始爲轉圜並非自來求我劉謂計窮可見竊謂此時再不訂約俄決不與續商再佔二十年亦不著急計果窮乎日本今之外部即前駐京之小村鴻曾與辨論俄事數次俄若久佔彼亦無法今謂回鑾後詰俄撤兵屆時詰之如仍不撤又將如何公論又何在耶所慮日本以詰俄之力轉而詰我何太膽怯日本豈能藉此興兵欲徐俟機會此後恐更無機會矣乞代奏請旨定

奪奕劻李鴻章咸

十八日 駐蹕洛陽縣城

軍機處致  
全權大臣  
俄約定後  
倘各國起  
而相難何  
策應付請  
覆電

軍機大臣致全權大臣電信 咸電已代進呈上意以此事利害關係甚重急切尙難定奪以中俄情好而論推誠相與原可即行定約亦斷不肯爲浮言所阻惟各國於天津至山海關留兵不撤之故窺其用意正以俄兵東三省久駐不撤彼此鍼鋒相對殆將觀釁而動至日本之疑忌更不待言若俄約有可藉口恐又橫生枝節皆勢所不能不慮究竟俄約定後倘日本各國起而相難纏擾不休有何應付之策此中須有把握總之我輩同受國厚恩休戚相關豈能因其笑罵膽怯多慮而不倍加慎重乎至天津尙未交還尊處前曾奏及即設法力與磋商想

奕劻等奏  
酌擬會試  
變通事宜  
摺請旨遵  
行

經婉切商議此俄事消息所關尤望及早籌辦一并電覆爲要

### 十九日 駐蹕洛陽縣城

皇太后皇上詣關帝陵及龍門山拈香畢進早膳復至香山拈香仍還行宮駐蹕

### 二十日 駐蹕洛陽縣城 是日雪

慶親王奕劻等奏酌擬會試變通事宜請旨遵行事本年六月臣奕劻李鴻章具奏停止考試一摺附片聲明揆度情形會試難在京城舉行將來祇可由禮部另籌變通之法當經奏准行知禮部在案禮部查向來辦法會試題派總裁官四員同考官十八員其知貢舉提調監試等官先後請旨飭派上年兩江總督劉坤一等奏准辛丑壬寅恩正並行

會試歸併壬寅年舉行自應先期籌備今會試既難在京舉辦祇得移借外省鄉試貢院除停止考試地方及離京較遠省分未便移借外查山東河南固屬距京較近惟總裁同考等官員數衆多同日馳驛誠恐沿途夫馬及尖宿處所供應太繁且山東河南兩省內簾房屋均係十四房祇有江南貢院兩省合考向係十八房規模較寬而總裁同考官等應預備馳驛前往者改由火車輪船亦覺便捷是否有當請旨遵行謹奏光緒二十七年九月二十日奉旨交政務處議奏

二十一日 駐蹕洛陽縣城

二十二日 駐蹕洛陽縣城

李鴻章奏據比利時國使臣姚士登照稱天津爲各國通商口岸比國

李鴻章奏  
與比使議

定天津租  
界章程請  
旨查押摺

向無租界擬在北河左岸俄國租界以下有地一段作爲租界等因前  
經臣行令天津道張蓮芬與之會議查勘所立四至界牌約佔地四千  
餘畝包有小孫莊大直沽莊二處因與小民生計有礙堅令劃出另撥  
前面臨河地一區抵大直沽莊前止以爲掉換當時不允頃始議定復  
飭該道等在京會同該國領事商定界址從俄界邊世昌洋行煤油棧  
起至小孫莊西止東西七百零一弓前自臨河起復至大直沽莊前止  
南北二百七十弓其餘尙有一地在大直沽莊西緊鄰俄界地一百八  
十弓現未劃給議明日後商務興旺准其購用計該國租界約五百餘  
畝磋商地價該領事允給銀四萬五千兩界內之地高下不一訂明以  
莊基爲上等平地爲中等水坑地爲下等略分等差已諭居民繳契領

價現將會議合同十一條稟請核奏前來查俄國前在天津訂立租界業經酌定草約二條奏明畫押比國承辦蘆漢鐵路來華商民漸多索給租界未便堅拒此次勘定租界尙於民情無礙仰懇天恩俯准將比國租界議定合同畫押蓋印以便交換謹奏

謹將議定天津比國租界合同十一條繕單恭呈御覽

一租地一段在河東俄國租界以下寬廣四至皆於圖內注明所有地畝民房由租界委員代爲購買立契交與駐津領事官收執比國商民即可在租界內建屋

二界內地段分出上中下三等按戶給價俟奉旨允准後一面交地一面交款界內有民間已蓋之屋仍准民間暫住俟用地時在六箇月

以前遷讓其拆屋費統於知會讓屋時由領事會同地方官公平給價不令喫虧其屋料仍歸民間自用如有墳地每棺約遷費銀四兩三租界靠近大直沽莊向有市廛人煙稠密今莊前臨河之地劃爲租界比國允許在下段界內讓出沿河一帶爲大直沽莊作碼頭之用如有各項船隻碼頭及上下貨物比國租界概不取碼頭捐及各項費用比國又許在大直沽莊自建碼頭其路寬廣約以中國三丈爲率修路費比國亦允代出莊內車輛貨物出入行走此路比國租界概不抽費如莊內有紅白事亦可於此路行走

四大直沽莊前原有水溝一道前通海河爲闔莊喫水之需在租界以內比國允許存留以通水道



五界內閩粵義地莊園比國亦允存留准人祭掃

六界內有法國洋商已買地一段由比國領事官查照別國章程與該商等自行商辦

七界內地畝歸比國經管後每地一畝按英法俄德租界章程每年在天津縣署交納租費界內別國洋商地畝租費亦歸比國領事官一并收齊交納

八中國如有犯罪人等逃入界內潛藏中國地方官亦按別國租界拿犯章程隨時知會領事官照章辦理

九日後如比國商務興旺欲與鐵路相通運送貨物中國允許照圖中所畫直線於大直沽莊西合中國一百八十弓之內通路一條北與

張之洞致  
樞垣賠款  
緊急擬在  
宜昌加抽  
土藥稅二  
成電

鐵路相接如於墳墓有礙設法繞越修路之外如比國另有用地之處亦可於此百八十弓之內擇地購用地價議給此百八十弓內中國應諭知各鋪戶此後不得賣與別國

十界內如有未盡事宜仍可由地方官領事官隨時會商另立續約十一以上所議各條奉旨允准後接繕華文法文彼此畫押蓋印以昭信守

又奏革員龔照璵捐賑銀一萬兩請開復原官摺奉旨著不准賞收張之洞電信 賠款緊急現擬將宜昌關土藥稅加抽二成本省各局土藥稅釐亦加抽二成自十月初一日開辦查湖北土藥稅釐去年已加抽三成今又加抽二成並不病民此款專爲新賠款而設不與他項

盛宣懷致  
樞垣報李  
相吐血電

劉坤一致  
樞垣據李  
使稱日外  
部告新俄  
約情形電

稅釐相涉合併聲明

盛宣懷電信 傳相昨夜吐血幸未再吐惟頭眩體弱恐難即愈外部  
徐侍郎今早痰疾出缺慶邸辰刻由京起程到開封

奉懿旨李鴻章吐血甚深系念著加意調養隨時詳陳病情

二十三日 駐蹕洛陽縣城

劉坤一電信 李使電頃外部言聞俄廷以新約五款交全權一前次  
議約及一切議論概行作罷從新訂款二東三省全境並牛莊交還惟  
榆關至牛莊鐵路限畫押之本年內交還三畫押之本年內奉省俄兵  
全撤四定約日起兩年後吉林黑龍江俄兵陸續撤退五中國派兵應  
由盛京將軍與俄武官商定惟不得用礮隊以上各款如果確實中國

仍未可盡允數日前日本已電駐京署使章告慶邸大致謂此次俄約較前已輕惟所開各款不但中國未能滿意即在俄亦不能算詳盡現未見全約固難逐款議駁惟四五兩款則深知不妥必須駁改第四款撤兵之期語涉含糊第五款侵奪中國主權凡兩國訂約語意含糊者弱國多受虧強國將含糊之語自作解說逼令照認如第四款照允撤兵之期由俄自定勢必遷延與永遠何異須改爲吉林黑龍江兩省俄兵限定約後一年內陸續撤退如第五款亦照允則邊防永弛日後設有匪亂亦難彈壓俄必藉口再據其地此款應添改俄兵撤完之日此款即行刪除一語以上兩款倘俄不肯允應即緩商極於中國有益俄前布告各國語太結實因亟催訂約以銷前案其情甚急設不得已仍

當減輕日本前因俄約屢勸全權並電江鄂一面並勸俄廷此次復告皆爲東方大局起見幫助中國實出至情聞新約日內將定雖難遽信但事關重大深望此時格外留意體察情形奏懇朝廷慎重勿信一面之詞免誤大局設有疑難務希垂詢日本政府俾從速代籌勿誤機會並請將日本使告慶邸各節轉達政府等語屬電達云日本代籌各節極爲扼要如能照此添改最妙否則仍用宕訣以待機會爲禱

奎俊電信 鹽斤加錢四文此事本應急辦惟川省與各省情形不同即以兩淮比較淮賤課輕川貴課重查川省腹地有票私交斥邊地有滇粵私鹽侵往又有淮鹽相抵三面受敵加以各屬私產之鹽私售若加四文立見滯銷惟有每斤加三文歲可得六七十萬稍資補苴耳

旨王文韶瞿鴻禨著辦理京津榆關鐵路一切事宜仍著張冀會同辦理

交片夏毓秀所統各軍著在洛陽縣一帶駐紮聽候回鑾日期

旨鄧增一軍隨扈至中牟縣即折至滎澤河口北渡均至懷慶衛輝彰德一帶分別擇地駐紮聽候開封啟鑾日期

二十四日 行四十里義井埠屬洛陽 三十里偃師縣城駐蹕

上諭外務部左侍郎着呂海寰署理未到任以前那桐署理

二十五日 行三十里黑石岡屬鞏縣 三十五里鞏縣城駐

蹕

慶親王奕劻奏請派出使英國大臣摺

二十六日 行三十里老犍坡館

屬汜水縣

三十五里汜水縣城

駐蹕

李鴻章電奏 臣病十分危篤京師根本重地非慶親王回京不足以

資鎮懾敬乞天恩電飭慶親王奕劻無論行抵何處迅速折回大局幸

甚現已電令藩司周馥來京交代一切矣

懿旨電李鴻章覽奏深爲廕念該大學士爲國宣勞憂勤致疾著賞假

十日安心調理以期早日就痊榮膺懋賞有厚望焉

懿旨電慶親王奕劻計將行抵磁州即着迅速來汴毋延

李鴻章奏  
病勢危篤  
請飭慶親  
王回京電

周馥稟  
李鴻章  
本日  
出缺  
電本

## 二十七日 行四十里駐蹕滎陽縣城

直隸布政使周馥電稟 大學士直隸總督李鴻章於本日午刻出缺  
所有總署關防敬謹封存特電稟

旨王文韶著署理全權大臣直隸總督兼北洋大臣著袁世凱署理未  
到任以前著周馥暫行護理

旨山東巡撫著張人駿補授未到任以前著胡廷幹暫行護理

懿旨大學士一等伯爵直隸總督李鴻章器識淵深才猷宏遠由翰林  
倡率淮軍戡平粵捻諸匪厥功甚偉朝廷特沛殊恩晉封伯爵翎贊綸  
扉復命總督直隸兼充北洋大臣匡濟艱難輯和中外老成謀國具有  
深衷去年京師之變特派該大學士爲全權大臣與各國使臣妥立和



薩保奏俄  
員請辦黑  
省各礦  
擬草約十  
四條摺

約悉合機宜方冀大局全定榮膺懋賞遽聞溘逝震悼良深李鴻章著  
先行加恩照大學士例賜卹賞給陀羅經被派恭親王溥偉帶領侍衛  
十員前往奠醊予謚文忠追贈太傅晉封一等侯爵入祀賢良祠以示  
篤念盡臣至意其餘飾終之典再行降旨

二十八日

行三十里趙村館

屬榮陽縣

四十里鄭州城駐蹕

署黑龍江將軍薩保奏竊查黑龍江本多礦產自開辦金廠後出金最  
旺之區與俄境隔江相望久深歆羨現在俄官洛特科來此以吉林已  
奉旨俞允另擬江省章程屢催照辦當此財疲力竭苟能藉俄人之資  
力擴極塞之荒政而權不旁落未始非興利睦鄰之道要亦不能不通  
盤籌畫免留爲江省後日之累因即派員會商權議草約聲明此約不

過令礦師採勘而已辦礦章程容俟國家允准俄人在江開辦方能議訂謹將一切情形爲皇太后皇上陳之俄使之來此初意股分一事不特不准他國預聞並不願華人搭附亦知股不易集然竟任其明言硬霸竊慮滋各國藉口之端況近來鐵道已有專用俄工者矣江省礦廠與俄界逼近若不慎之於始恐有聞風鬻集者矣故奴才於爭論華人應有入股之權外並將農工商各營業不嫌瑣碎議及該俄員允將以上各節詳列照會至草約十四條與吉林所議不甚懸遠各條外如第四條不能保護一說因江省現在無兵械不如從直聲明免生枝節即第六條地價一事彼初議以官地不能給價奴才詢諸本地民人則云除各廳衙署外均屬八旗公地一經開礦勢必人煙湊集數十百里間

圍獵無資關繫大衆久遠生計即使優計價值誰肯輕許奴才因議令將餘利百分之五作賃地之資該俄員允先列公平給價一說以俟奉准開辦再議爲辭然爲江省計似以賃給爲宜或以礦地充作股本均先安定章程或可稍有限制蓋此中情形不可與鐵路同日語也第八條報効之數雖遠遜從前觀音山漠河各廠而與寬河定章尙屬相符第十條所稱准給俄商執照各處係在省城以北與東路松花江下游一帶因已辦之金礦爲漠河奇禮河觀音山都魯河寬河等處雖都寬兩省尙未奏效然究係奏明招股開辦有案若漠禮觀三廠早經北洋大臣派員招股主辦有年報効軍餉甚鉅並經前將軍恩澤於二十二年奏奉旨議准凡呼倫貝爾城與愛琿即黑龍江城各轄界統歸漠河

金廠採辦且據前督理委員周冕於二十二年稟明分段設局奉勅在案茲聞其間頗有華俄金匪私挖之處緣該兩城地處省城西北其大小河流之匯入額爾古納河與黑龍江悉其轄境要不外循興安嶺爲界雄厚綿長宜其金穴之多也此外尙有雅魯河綽爾河等處查該兩河發源興安嶺東南匯入省城西南之嫩江近年亦見金苗恩澤於二十五年冬准令商人領照試採以上各處或係已成之局或屬粗有眉目均未便遽讓外人而俄員之注意漠河觀音山等處尤屬情見乎詞奴才始終以該各礦屬在愛琿界內照案呼倫貝爾與愛琿即黑龍江兩城境內礦務應由北洋大臣主持不敢越權擅議辭之所以有另議各該礦條陳咨送礦務總局核奪之說相應請旨飭下全權大臣及礦

務總局速議核覆俾有遵循嗣後如有另議漠河等礦條陳送到再行請旨謹先將俄員照會草約十四條繕單呈覽伏祈聖鑒

知會一件

爲知會事茲上俄人採辦黑龍江省金鐵煤各新礦草約二分煩貴將軍畫押查此約所載辦礦各節不過大略一經畫押可令礦師首往探勘而已至於辦礦詳細章程俟中國國家允准俄人在江省採辦礦產之後方能議訂該礦師等奉到在江省辦礦明文請貴將軍邊派熟悉礦務通曉俄文聲名素著之員到廠監察所出金數並管束華人如果貴國家允准俄人在江省開辦金礦後本官員必設法令辦礦人多用華工從優看待所有礦內商農生息均歸華人營幹

仍聽俄人就地販運不得把持每次設立股分開採新礦華人應有入股之權其詳細章程俟後再定

草約十二條

一此約一經畫押即准俄人在界內採辦金鐵煤各礦苗

二由將軍發給專照

三執照祇可發給俄國派駐江省外部官員身家殷實之人

四採辦金鐵煤各礦苗之人凡遇地方一切危險之事中國地方官現在不能保護由伊等自行防備抵禦

五採勘金礦之人宜分定界限以免爭端

六禁止採苗之人騷擾百姓並毀壞廟宇穿墳等事犯者重辦如旗

民同採勘礦苗喫虧酌量賠償如在旗民產業公地之上採得礦苗非官地者公平給價

七採勘礦苗俄人每次查出新礦應呈報外部官員卽由外部轉達將軍其出金所在方向地名及段落界限一切情形並如何開挖均須報明報明之後由將軍給照准其在所指地方開辦

八採勘金礦屆時開辦每出金百兩報効中國國家十五兩其餘各礦如何報効日後再定每廠由將軍派一委員監察所挖金數及管束華人

九採勘礦苗非但刻下地方未盡平安日後亦恐偶有阻礙及一切意外之變故所指採勘地方應予以兩年爲限再採勘之人雖在所

轄地界尋出一處金子報到後准其仍在界內再行量力採勘如三年限內並不報到查出礦苗即將所指准勘地界另給他人

十此約專指俄人採辦新礦而言議定自齊齊哈爾往上凡兩岸大小河流匯入嫩江者各至源頭及嫩江源爲止及呼蘭口以下與都魯河口以上凡大小河流匯入松花江者各至河源爲止對岸吉林界不在內均可由將軍發給採苗執照俟將軍與外部官員此約畫押後另擬漠河觀音山二礦及都魯河寬河各商辦金礦條陳咨送北京礦務總局查核定奪

十一陋勘金礦凡有與將軍往來事件須由外部官員轉遞

十二此約兩分華俄合璧由將軍同外部官員畫押



薩保片  
人限制兵  
民給械使  
我商民生  
計請飭力  
爭片

薩保片 再俄人近來布置關繫政權甚重恭摺密陳仰祈聖鑒事竊奴才前以民間不可一日無械情形曾在五月間匪勢日張摺內陳明在案嗣與在省俄官武廓米薩爾索克再三辨論始允先行給還鎗械一千六百八十八桿以應去年原議暫設各城鎮台站巡捕兵之用但須由彼給發腰牌令我造送職名清冊吏調開補隨時知會奴才又與熟商又允除有巡捕兵各處外其餘屯堡每按兩家給鎗一桿然撤去團練名目稱爲鄉勇充以上著專事護家不准持械遠行並令自屯長以上該管各官層遞加保直至將軍爲止保其實係可靠良民始能照辦以上情形若暫時爲民請命起見不得不勉強含忍若竟永以爲例則後慮正長政體何在所以奴才至今尙瞻顧旁皇不能自己也先前

所有交涉皆由該武官廓米薩爾經理自五月以後又來有文員科路科福核其俄文官銜似係外部委員如副領事之類而漢文則以大臣自居其橫狡爲最除礦務情形另摺奏聞外現在凡屬商務交涉改歸該俄員經理無論華商販運貨物及空手遠行之人皆須向其領票即官中差員亦須一律照辦若使出入彼疆猶之可也乃或則同在東三省地界或則並未出本省境內亦須領票守候困累不堪推其命意無非侵我商民生計起見若失今不理恐將成例查俄廷要還東三省若我之兵丁商民舉動不得自由官中反須聽彼指使則主權盡失亦安樂有此空名況自兵亂以後竟有忘其身爲世僕以忍心害理之舉爲爭榮競進之階初尙不過一二人近則俄官告人以能操進退之柄效

尤更多將來風氣所趨伊於胡底伏乞飭下全權大臣於議訂三省約章時能使官有立足之地並勿奪我兵丁商民自主之權疆界之間無論邊腹寧使劃然分明不任糾紛輾轉則猶可自立也伏祈聖鑒酌裁奉旨外務部知道

又奏密陳俄人布置情形摺

二十九日 駐蹕鄭州城

慶親王等奏京城善後協巡事宜摺

三十日 駐蹕鄭州城

西巡大事記卷十終